

AWEMainta

E DIFERENCIA DEN NOTICIA

UN SITUACION INSOSTENIBEL:

E PRIZON KIA MANERA UN BOM DI TEMPO



**LIDER DI MEP
CU DENUNCIA SERIO
CONTRA FORSA AHENO CU
PLACA PA TUMBA GOBIERNO**

**PELIGERNAN LUBIDA:
CON ARUBA A MANEHA SU
DESPERDICIONAN TOXICO**

**CRISIS DI ANIMALNAN
DI CAYA NA ARUBA:
UN SOLUCION PERMANENTE
VIA STERILISACION**

Tired of **Manually** Processing Forms?



SCANSYS
vision on imaging

- Digital Processing of Purchase Invoices and more
- Seamless Integration with most Financial Software
- Complete Control of Authorizations via Workflows

VCC
International NV

This **OCR software** scans any kind of document and automatically fills the data in your preferred financial/ERP software!

TEL. 583-7072 | info@vcc-int.com | www.vcc-int.com

Un situacion insostenibel:

E prizon KIA manera un bom di tempo

ATROBE nos ta tende e mesun promesanan den e temporada di eleccion aki: un prizon nobo pa Aruba. Pero kico nos ta mira en realidad? E Instituto Coreccional di Aruba (KIA) ta na rand di un situacion peligroso, tanto p'e personal como p'e detenidonan mes. Ta wordo bisa constantemente cu no tin placa disponibel, y parece cu no por haya un localidad adecua. Ningun barrio kier un prizon den su cura di cas. Mientras tanto, e gastonan pa mantencion di e facilidad actual ta keda subi, mientras cu e siguridat y bienestar di tur esnan involvi ta bou presion.

E realidad di KIA

KIA pa añanan largo ta un punto di preocupacion den e sistema di prizon di Aruba. E edificio ta anticua, y e facilidadnan ta mal manteni. E gobiernonan anterior a priminti bes tras bes pa reemplasa e prizon, pero cada biaha esaki a wordo posponi. E excusa? No tin placa. Esaki ta zona manera un refran cu ta ripiti ora ta trata proyectonan grandi riba e isla.

Ademas, e asunto di e localidad ta keda un obstaculo grandi. Mayoria barrio riba e isla no kier un prizon den nan vecindario, pa miedo di molester y problemanan di siguridat. Esaki ta hiba na un impase, unda tin hopi palabra pero poco accion.

Peligro pa personal y detenidonan

E mal estado di e prizon no ta solamente un problema p'e personal cu mester traha eyan diariamente, pero tambe p'e detenidonan cu ta cera eyan. Medidanan di siguridat anticua, infraestructura deficiente, y demasiado poco recurso ta haci KIA un luga peligroso. E edificio ta menasa di bira un bom di tempo. Si un incidente grandi tuma luga, posiblemente hasta cu victimanan mortal, nos lo bolbe puntra nos mes pakico no a interveni prome.

Promesa tras di promesa

Cada gobierno nobo ta priminti mehoracion, pero finalmente hopi biaha ta keda na palabra so. Nan ta priminti pa construi un prizon nobo, nan ta priminti pa mehora e condicionnan, pero e practica ta mostra cu esaki casi nunca ta sosode. E argumento di falta di recurso ta bolbe bek cada biaha. Tambe e edificio actual ta wordo uza ainda, a pesar cu ta obvio cu e no ta cumpli mas cu standardnan moderno. Un inspeccion structural ta parece sumamente necesario, pero hasta esey ta parece demasiado pidi p'e partidonan involvi.

Cua t'e alternativanan?

Kico por wordo haci realmente awor? Un posibilidad ta pa

considera un renobacion profundo di e edificio actual, pero hasta esey lo ta sumamente costoso. E situacion actual ta exige mas cu djis reparacionnan cosmetico; ta trata di un infraestructura completo cu mester di renobacion. Un otro opcion ta pa busca experticio internacional pa yuda haya un solucion duradero cu ta tanto sigur como financieramente factibel.

E prizon KIA ta un bom di tempo. Tin un necesidad urgente pa accion, no pa mas promesa cu ta wordo revisa solamente n'e siguiente eleccionnan. Ta bira tempo pa gobierno wak seriamente na alternativanan y tuma responsabilidad p'e siguridat di tanto e personal como e detenidonan. Laga nos no warda te ora ta laat.

Atraco team cu dos detencion

DIAMARS den oranan di madrugada a haci un entrada hudicial y a haci detencion di dos sospechoso.

A haci e entrada hudicial hunto cu Team di Aresto na un cas na Tanki Leendert.

N'e cas en cuestion a detene dos sospechoso. Ta traha di e homber di inicial J.H. naci na Aruba di 19 aña y J.H. naci na Aruba di 28 aña.



Un ta deteni en conexion cu un atraco riba dos turista den e area di hotel y e otro sospechoso a keda deteni en conexion cu un atraco na altura di Mama Snack na Carnival Village. Den tur dos atraco a uza arma di candela.

Atraco Team ta traha incansablemente pa soluciona e casonan y pone man riba e sospechosonan.

Un biaha mas Cuerpo Policial ta haci un apelacion na cada un ciudadano cu sa algo of a mira algo, pa yama e tiplijn di polis cu ta 11141. Bo anonimidad ta keda garantisa.